

Zeitschrift: Schwyzerlüt : Zyschrif für üsi schwyzerische Mundarte

Band: 13 (1951)

Heft: 7-9

Rubrik: Us em Läbe vom Chrüterpfarrer

Autor: [s.n.]

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 24.08.2025

ETH-Bibliothek Zürich, E-Periodica, <https://www.e-periodica.ch>

Us em Läbe vom Chrüterpfarrer

Vom Helfe und Heile

E chorzi Lebesgschicht vom Pfarrer Johann Chüenzli

Es ischt am 11. Januar 1945 gsii, wo z Wangs obe, i de Sibeschmerzekapell s Glöggli wiit is Rhintel abe und ufe, is Seetal döre, gegen Gonze zue und ufe zum Piz Sol grüeft hät und glüütet:

Lönds eu säge, liebi Lüt,
hüt send mer e Abschiidsglüüt,
vil, vil Städter, ali Buure
und vil Aarmi tüend hüt truure,
de Pfarrer Chüenzli, oh, wie leid,
weerdt is dunkel Graab jetz gleit.

Und trotzdem, daß es bitter chaalt gsii ischt und Stei und Bei gfroore, isch es ganz schwarz gsii vo Lüte, wo erem Frönd und Helfer, em liebe Chrüterpfarrer Johann Chüenzli, di letscht Ehr aatue hend. Natüürli hend nöd ali chöne choo, wo gäärn cho wäred go danke. Natüürli häts au vili gkaa, wos Danke überhopt vergesse hend. Wenn ali choo wäared, wo Guets erfahre hend vo em, du mini Güeti, denn wäär s Fridhöfli vo Wangs jo überhopt vil, vil z chlii gsii, zum si ali fasse. Und de Pfarrer Chüenzli ischt jo au nöd deseb gsii, wo mit Dank grechnet hät. Er hät sis Liechtli, graad wie de Herrgott selber, lüüchte loo über Grechti und Uugrechti. Er hät nöd noch em Name und nöd noch de Konfessioo gfroogt, er hät blos gwößt wer zu em choo ischt, dem fehlts neime, am Liib oder a de Seel und er hät nie nünt anders wöle, als helfe und heile.

Das Wöörtli «helfe» ischt über sim ganze Lebe gstande. Scho dehei, wo er als jüngschte Bueb de Mueter gholfe hät im Huus und im Stall. Er ischt am 3. Sept. 1857 im Heiligchrüz bi St. Galle uf d Welt choo. Hans-Töni hends em ase chline gseit. Und s Heimet, wos Chüenzlis gwohnt hend, hät Hender-Espe gheiße. Und vo dem Heimet uus hät me en wiite Blick gkaa, bis in Sentis ufe und bis in Bodesee abe. Nöd e Wunder hät au das Büebli för siner Lebtig en wiite Blick überchoo, nöd no för d Schönheit vo de liebe Schwizz, för eri Berg und Alpe bsonders, nei, au en wiite Blick för sini Mitmensche und ales, was s Lebe ene zum träge uferleit hät a Schönen und a Schwäärem.

Scho als chliine Bueb, woner no zchlüi gsii isch zum Melche vo de zwei Chüehli, wos gkaa hend, hät er doch de Mueter gholfe; er häd de Chüehli d Schwänz ufbonde, häts gstriglet, häts gfueteret und hät ene gmischtet. Und nebetbii — er isch

siner Lebtig en Tierfrönd gsii — hät er sini Freud gcaa a de föf braave Gluggere, wo im Tenn und uf de Wees omespaziert send, hät mit de Chatz ggoopet und hät bald, wie sin Brüeder Wilhelm, ali Tierstimme noomache chöne, daß es grad e Freud gsii ischt. Wenn s zum Bispil «Chäuzlis» gmacht hend, so lebendig und düütlichech und denn d Nochberei, wo e chli e abergläubigi Frau gsii isch, gjoomeret hät: herjeh, herjeh, jetz mues gwöß öpper sterbe; denn hend natürli die Buebe di grööscht Freud gcaa und hend grad dröberabe de Hüehnervogel noogmacht, daß d Henne de gnootigeweg heigflove send us luuter Angscht, es gäng ene as Gfider!

Aber me taar jetz nöd meine, die Chüenzli-Buebe heied nünt als Alotria im Chopf gcaa, potz tuusig nei, för daas hends eigeblech gäär kei Zit gcaa und Vatter und Mueter hend ene daas scho ustrebe. Bsonders de Vatter isch Respektsperson gsii för das jung Völchli. Er hät bime Handelsgärtner i de Stadt ine gschaffet und isch en wackere, gschiide Maa gsii. Drei Johr lang zweiwoor ischt er blos i d Schuel gange, aber was er doo glernt hät, isch gsässe, und i sim Bruef, doo ischt er denn scho aschuur gsii. Er hät ali Pflanze und Bömm und Strüücher de latinisch Name chöne säge, hät sich ufs Bschniide und Veredle verstande und sin Jüngschte, ebe üsen Hanstöni, hät em wacker gholfe debii und sicher hät er vo sim Vatter di allereerschte Begreff und di eerscht Liebi zum groose Gottesgaarte übernoo.

Leider hät de Vatter früeh müeße sterbe. De Hanstöni ischt doo eerscht elf Johr aalt gsii und no keis vo sine Gschwöschterti, si send doo no erer föfi gsii, vier Buebe und e Meitli, hät de Mueter chöne d Lascht vo dem Heimwese abneh. De eint isch inere Schuemacherlehr gsii doo; de ander isch i d Kantonschuel ggange, zum Lehrer studiere.

No, die braav Frau hät uf eri fliisige Hend und uf de Herrgott vertraut. I de Stobe ine isch jo de Sproch ghanget: «An Gottes Segen ist alles gelegen». Und vom Herrgottswinkel uus, wo ali Tag die Mueter mit erne Chinder, wie scho zu Vatters Zite, bätet hät, am Morge und am Oobet und voor und noch em eifache Esse, isch denn au die erwaartet Hülf choo. Si häts möge baschge, daß de Ferdinand sini Lehr hät chöne fertig machen und denn ischt er uf d Walz; de Wilhelm hät wiiter tööre i d Kantonsschuel goh. Er hät aber denebet de Mueter braav gholfe und isch kei bitzli hochmüetig worde. No, statt daß er denn spööter lang als Lehrer gwirkt hät, ischt er uusgwanderet uf Amerika und hät dei dor dick und dönn döre müese, bis er denn schließleich wider i de Heimat glandet ischt und dei zu Amt und Aaseh choo ischt. Aber seb ischt denn ebe vil spööter gsii. De Augustin hät denn bald e chli gholfe verdiene und ischt



Der Johann Künzle
als Gymnasiast

Knabeseminar uf St. Jörge Erzbischof Zardetti, de Regens Isering und de spööter Bischof Ferdinand Rüegg gsii.

De Grooßbrootsbeschluß vom Johr 1874 hät denn allerdings de Johann, samt sine sibe Mitschüeler, zum Uszug zwunge. S Knabeseminar ischt ufhobe worde.

Uf daas hee ischt de Johann zu de Benediktiner uf Eisidle ggange, hät studiert und studiert und gholfe singe, bim Frueh-amt am Morge und bim Salve vor de Gnaademeter am Nomittag. Isch s Studium e chli zstreng gsii, s Klima e bitzeli z ruch? Uf jede Fall isch üsen Student z Eisidle ine so verchranket, daß sin Brüeder, wo om di seb Zit vo Amerika heicho ischt und en bsuecht hät z tood verschrogge isch und kei Blatt vors Muul gnoo hät. «D Uszehrig häsch jo», hät er pätsch-use gseit. Aber denn hät er em neui Körper- und Ootem-Uebige biiproocht; de Johann hät die fliisig und mit Uusduur gmacht und ischt wider uf d Bei choo.

Sin liebschte Professer ischt de Botanikprofesser P. Ludwig gsii. De hät aber au sis Fach nöd blos eso troche i de Schuelstonde glehrt, er häts lebendig und intressant uf de Spaziergänge vorbrocht. Und daas ischt natüürli Wasser gsii uf d Möhli vo üsem Johann Chüenzli.

Sini Philosophii- und Theologii-Studie hät er z Belgie, a de Universität Löwe gmacht. Zeerscht hät er zweor no müese sis Schuelfranzösisch uufchlepfe. Und denn hät er aber «d Fröndi» gnosse. Er hät nöd no a de Uni studiert; er hät au Land und Lüüt und Brüüch mit offne Auge aaglueget, hät flämisch und holländisch glernt, hät sich mit Wallone, Irländer und mit pol-

i d Fabrik gange. Aber die Aarbet hät en au nöd e bitzli befridiget und er hät bald is kantonale Lehrerseminar dore gsattlet, hät s Exame glänzend bestande, und won er sini eerscht Lehrerstell z Wildhuus obe aatrete hät, hät er d Mueter, d Schwöscher und sin jüngschte Brüeder chorz und bündig mit sich is Schuelhüsli uf Wildhuus und bald noher, mit uf Schöne-wege gnoo.

Vo dei isch denn de Johann no i di letschte Klasse vo de Volksschuel gange und vo dei, woner sich uf sin Bruef bsone gkaa hät: — er hät wöle Pfarrer werde, zur große Freud vo seiner Mueter — isch er is domoolig choo. Sini Lehrer send de noomoolig

nische Mitstudente befröndet und hät demit en wiite Gsichtskreis überchoo. Statt i de vier enge Wände z büffle, ischt er uuszoge i Feld und Wald und hät onderwägs sis Hirni mit Dogmatik und Philosophii gfüetteret und zum Gegegwicht hend d Auge d Welt betrachtet; i de Feeri d Musee, d Seehäfe, d Architektur und — s allerschönscht för sin Begriff: di botanische Gäärtle und Tribhäuser!

Mit Klavierstonde, woner ggee hät und mit Korrespondenze för schwizerisch Ziitige, jo, sogäär mit Messmerdienscht hät er glueget, sis tüür Studium e chli z kompensierte. Und en fröhleche Boorschtsch isch er gsii und hät för sini Schwiizer-Heimat Ehr iigleit. Soo hend emool die internationale Studente ame Festtaag jede sis Nationallied gsunge. Uesen Johann hät aber weder de Schwiizerpsalm, no: «Rufst du, mein Vaterland» dezue gnoo, er hät frisch und luut «De Ustig wott cho . . .» in Saal usegschmetteret und hät demit de Vogel abgschosse. Jo, das Liedli mit em heimelige Dialekt hät esoo guet gfale, daß es sofort vome Männerchoor öbernoo worde ischt. Und de Applaus hät nöd uufhöre wöle.

Aber trotz alem Schöne hät er als rächte Schwizerbueb Heiweh gkaa zu sim Land und zu sine Berge und zu sine Liebe dehei.

Noch sechs Semester hät er sis «Valete» gseit zum frönde Land und ischt wider hei. Er ischt grad rächt choo. D Mueter isch schwäär chrank gsii. Und för de Johann isch es e Selbschverständlichkeit gsii, dem chranke Müeterli zhelfe, so guet er no hät schöne. Er häts all Taag veruse treit a d Sone, hät ere Obscht und Frucht broocht und hät nöd logg loo, au nöd mit Bäte, bis die guet Mueter wider zu Chräfte choo ischt.

Doo eerscht hät er d Feri gnosse und ischt go wandere und go chraxle mit Nagelschueh und Roggsagg und hät Strüüßli heibroocht vo Enzian und Männertreu, vo Bergnägeli und Altmannli, hät sich d Bagge bruu brenne loo vo de Sonn, und s Herz isch voll worde vo Begeisterig über Gottes schöni, herrlechi Welt.

Und denn ischt er ufe, is Prieschterseminaar z St. Jörge. Und au seb isch schöö gsii, wenn au di seb Sone meh inwendig als osse gschune hät und immer chräftiger worde isch mit jeder Weih, wo de Bischof dene junge Kleriker ggee hät. Und seiner Lebtig hät er di seb Nacht nöd vergesse, wo seiner Priesch-



Der Johann Künzle
als Rekrut

terweih voruus ggange isch und wo nomool daas, was er scho lang überleit gkaa hät, wach worde ischt: di grooß Verantwortig, wo grad **de** Bruef i sich schlüüst, die Verantwortig vor sich selb, vor em Herrgott, vor de Mensche, d Verantwortig för Zit und Ewigkeit. I desebe Nacht hät er kei Aug zuetue und hät a eimfort bätet, de Herrgott soll en lieber sterbe loo, als zume uuwürdige Prieschter mache. Und denn isch de grooß Taag doo gsii, de Taag, wonen för siner Lebtig gfreut und kei einzigi Stond greut hät: de Johann Chüenzli ischt Prieschter gsii! Und zwei Woche nochher hät er Primiz gfiret z St. Galle i de Kathedrale! Wie hend doch doo die Glogge glüütet, wit über d Stadt use, wie hends glüütet im Herz vo de öberglöckleche Mueter, wie hends gjublet tüüf ine i de Seel vo dem Jungprieschter, woner bätet hät: Introibo . . .

Und denn, scho zwei Tag nochher, häts gheiße a d Aarbeit, a d Aarbeit im Wiiberg vom Herrgott. De eerscht Wiiberg för de Vikar Chüenzli ischt z Gommiswald hene gsii, nöd lang; denn ischt er als Chaploo uf Mels choo; en guete, liebe Pfarrherr hät uf en gwartet und e Hüsl, woner sini lieb Mueter hät chöne zu sich neh. Au s Oberländervölchli hät em gfale und bsonders Freud hät er gkaa a de Berge ringsom, em Gonze vor em zue und em Wißtannenthal, wo me so schöni Spaziergäng und Tuure hät chöne mache, bis wiit zum Foopaß ufe. Aber au doo hät er scho bald wider müese wiiter. Di drett Stazio hät gheiße: Cherchberg im Toggeburg. Und isch au s ei wie s ander im gliiche Kantoo und im gliiche Bistum, so isch doch zwöschet dene Stazione en himmelwiite Onderschiid vo Land und Lüüt und Sprooch. — No, de Chaploo Chüenzli hät sich suuber und glatt wider chöne aapasse, s Toggeburg isch jo scho emool sini Heimet gsii, i de Buebejohr, wo sin Brüeder z Wildhuus obe Lehrer gsii ischt und so ischt er au bald wider dehei gsii im neue Erdrich. Bsonders guet hät ers alewil mit de Chinder chöne. Und hät me d Chind, daas ischt e aalti Gschicht, so hät me au d Eltere.

E netti, chliini Anekdot verzelt me hüt no dei obe. Er hei, wil er e Halsliide gkaa hei, öppe, mitte währed de Unterrichtsstond, müese use. Und denn hei er de Chind empfohle, rüebig zsii, «haltet d Schnäbel, lueged nöd ome, em Heiland zlieb, hei er ene gseit. Und daas heied die Chind prompt bsoorget, sodaß, wo unerwaartet emool de Pfarrer inegluget hei und gfroogt hei: «Wo ischt de Chaploo?» es gheiße hei: «Er chont grad wider». — «Und wer hät d Uufsicht?» es unisono gheiße hei: «De lieb Heiland». Daas isch doch no Disziplin gsii!

Zwei Johr lang hends en z Cherchberg gkaa und denn ischt er scho Pfarrer worde, z Libige hene, wos vom Toggeburg gege d Chrüzegg ufe goht, fascht, fascht dei, wo di berühmte Füchs

und Hase enander Guet Nacht säged. Üsem Pfarrer Chüenzli und siner Mueter häts aber au doo wider gfale; no d Cherche ischt ime Zuestand gsii, daß s eim s Herz omtreit hät im Liib. Was macht de neu Herr Pfarrer? Zu dene Libiger Chliibuure, do chaner nöd goh, go bettle. So nent er chorz und bündig de Bettelsack und fahrt noch Belgie. Dei hät er studiert, die Lüt hend Geld und hend s Herz ufem rechte Fleck und er kennt en ganze Huufe. Und s goht gäär nöd lang, chont er wider ome, er strahlet mit em ganze Gsicht und denn fangt er aa, renoviere und ombaue und d Oorgle inen mensche- resp. gottwürdige Zuestand bringe; s isch grad e Freud gsii zum Luege. Es isch klaar, daß er gliichzitig au i de Seele vo sine Pfarrchind renoviert und baut hät, so vil er hät chöne. Und zu alem ane, ischt em i dene föf Libiger-Johr no Zit blebe zum Schriftstellere. Er hät d Redakzioo vo zwei religiöse Zitschrefte öbernoo und hät groose Erfolg gkaa.

Z Amde, siner zweite Pfarrstell, hät er denn die beide Blätter no wiiter uusbaue und hät en öberuuus guete Kontakt mit sim Leserkreis öberchoo, so en guete, daß er mengmool drißg und meh Brief pro Tag hät müese beantworste. Und wil me bekanntlech nöd ohni Noochteil zwei Herre diene chaa (er hät zwoor im mündleche Hirteamt und im schreftleche em gliiche, groose Herr sini Aarbeit ggee, no inere andere Form), so hät üsen Pfarrer Chüenzli, mit de Erlaubnis vom Bischof, sis Pfarrhüsli verloo und ischt mit siner Mueter und mit Sack und Pack uf Feldkirch use zoge, is Vorarlberg. Dei hend sini beide Blätter und er selb als **religiöse** Schriftsteller, eri Blüetezeit erlebt. D Abonnentezahl ischt uf honderttuusig gstege. Sini Aart z schribe ischt volkstümlech, lebendig und klaar gsii. Und bald hät me en au zu Vorträag uf Innsbruck, Boze, Münche, Regesburg und Köln grüeft. Bis es denn plötzlech zu Mißverständnisse und zunere Sturm- und Drangzit choo ischt und em nünt anders öbrig blebe ischt, als vo eim Ufer vom Rhii zum andere sis «Hol über» z rüefe und z Buchs wider d Pastorazoo, di eerscht katholisch sit de Reformazioo i dere Gmeind, z öberneh. Doo, z Buchs isch es gsii, woner eigetlech aagfange hät, nebet de Seel vo sine Pfarrchind au eerni liibleche Breschte i Behandlig zneh. Sini Voorliebi hät au doo de Chinder golte, för si hät er d Beeri i sim Gaarte und d Öpfel und d Bere vo sine Bömmle bestimmt. I de Alpe obe hend d Sene und d Bergbuure i sim Uuftraag und noch sine Aawisige Chrüüter gsammlet und er häts i sim Pfarrhuus zemetreit und verlese und deert und etigettiert. I Holzschueh und mit de grüene Schoß, so verzeled hüt no alti Lüt vo Buchs, hei menen gseh doors Doorf döre walze, so hei menen gseh si Pflanzblätz güle und mischte. Daas hät em natüürli eerscht recht s Herz vo de Landlüüte zuegführt, en Pfarrer, wo au eri Aar-

bet macht, und nöd z hochmüetig ischt, Herdöpfel zstegge und derigi Sache z mache, dee ischt de recht Hirt för si gsii.

Aber scho rüeft en s Woort vom Bischof anen neue Platz: uf Herisau. Onder dene Osseröhder hät er sich sofort wohl und dehei gfühlt. E chli chögele und giftle, e chli rääßi Witz mache und glich mit ale Lüte guet Frönd-sii, das häts em Pfarrer Chüenzli chöne. Und er häts ene chöne. Bsonders sends wider d Chind gsii, woner is Herz gschlosse hät. Er hät mit ene gsunge und glachet; si hend sini Gedicht oßwendig glernt und sini Bühnespiil ufgfüehrt, daß es grad e Freud gsii ischt. Und öppis isch z Herisau passiert, wo vo großer Bedüütig worde ischt för üsen Chrüterpfarrer. Anere Gant, me hät de Nochlaß vome Quacksalber, wo im Osserrhodische no taar praktiziere, versteigeret, doo isch e mordsdicks Buech, en aalte Schmöcker, uusgrüeft worde. Kein Mensch hät drof bote. Es isch kei Bible gsii, aber e Chrüterbuech und üsen Pfarrer Chüenzli häts om e par Fränkli ohni wiiteres überchoo und häts mit Freud heitreat. Was isch es gsii: E Medizinal-Chrüterbuech usem 16. Johrhondert, vome Professer Theodor Tabernaemontani (Hüttenberger) us der Offizin vom Johann Ludwig König & Brandmüller. Scho bibliografisch vo großem Wert, isch es för de Pfarrer Chüenzli mit ale dene schöne Holzstich und Beschriibige vo Heilpflanze e Fundgrueb worde, woner johrelang studiert hät und woner sini ganz spööter Chrütermedizin drof gründet hät.

Nebet dem Chrüterbuech hät er au d Werk vo de selige Katharina Emmerich und di alte Schrefte vo de heilige Hildegard, dere große Frau usem 13. Johrhondert, glese. Si isch d Begründeri gsii vo üserer Heilkunst und i de Naturwösseschaft e grossi Nummere. Es ischt eigetlech erstuunlech, daß de Pfarrer Chüenzli wo sös nöd grad en «Wiiber Frönd» gsii ischt, die Fraue und eres Chöne gelte loo hät und selb zu ene i d Lehr ggange ischt.

S Praktikum aber hät er immer und alewil wider i de Natur osse gmacht; er hät gseh, daß d Chatze de Baldrian gärn hend, daß d Ameise eren Bau mit Timian bepflanzet, daß d Schööf Schoofgarbe sueched, wvens e inneri Verletzig hend, daß d Dohle Tomateblätter i eres Nescht ine tüend, wvens vo Flöh und Lüüs ploget send, daß d Hönd Schliißgrääs fressed, wvens ene irged neime fehlt und hät us all dem und no vilem gschlosse, was em Tierli guet tuet, isch gwöß au för d Mensche recht. Und hend d Ärzt glachet über die Methode, so hät er eifach au glachet und isch demit am beschte wegchoo.

Onderdeß isch de guet Pfarrer Chüenzli wider emol zöglet, a sin letschte Pfarrposchte, uf Wangs. Demit ischt er wider uf st. gallischem Bode gsii, und doo nent mes mit de Naturärzt e



Chind bim Chrütersammle

chli hitziger, si send doo vo Gsetzes wege verbote. Das hät en gfuxt; denn grad z Wangs obe send d Chrütli i de Herrgottsapothek bsonders chräftig und heilsam. Si send jo au, so i de Berge obe, nööcher em Himmel zue. Di ätherische Oel, d Bitterstoff, d Nährsalz, de Fosphor und s Ise, und was sös no alls drennine enthalte isch, isch bsonders chräftig entwicklet. Jo no, er hät wiiter gsuecht, gfonde, prööblet und hät aagfange Büecher schriibe: «Chrut und Uchrut» isch usechoo und ... er hät au no aagfange pendle. Und hät au mit dere Methode, speziell im Grippejahr 1918, allerhand Erfolg 'chöne ufwise. Nebet em Erfolg aber häts, das isch jo nöd anderscht möglech, au böses Bluet ggee und plötzlech isch er bim Bischof verchlagt worde, wege sim «Doktere» und üsen Chrüterpfarrer hät de Root überchoo, sini ärztlech Praxis an Nagel zheengge. S isch en Root gsii, kei Befehl. Em sebe, so hät er gseit, tät er sich sofort onderwerfe. Wils aber glich e chli e zwiispältigi Sach gsii isch, ischt em d Liladig vom Churer Bischof Gregorius Schmid vo Grüneck, i sini Diöcese zchoo, grad wie gschmalze choo.

Weniger gärn hend das d Wangser gseh. Si hend eren Pfarrer, wo för si und för d Gmeind eso vil tue hät, noo uugärn goh loo. Aber was hends wöle mache? Si hend em zum Abschiid s Ehrebürgerrecht ggee und er hät jo denn au no devoo Gebruuch gmacht, woner noch sim letschte Wunsch und Wile, sis letscht Erdeplätzli z Wangs hät wöle haa.

Jetzt aber ischt er uf Zizers zoche, sini Nichte Christine mit em. Si hät scho sit Mueters Tod sin Hushalt gführt, hät



Ds Hei vom Chrüterpfarrer z Zizers

sini Sorge zu erne eigne gmacht und sini Freude redlech mit em teilt. E Güetli hät er gkauft und e Hüehnerzucht iigrichtet, s isch fascht wider gsii, wie anno dazumal z «Hender-Espe» im Heiligchrüz. Aber s isch nöd lang eso e Idylle blebe. Scho am drette Taag, woner z Zizers gsii ischt, send di eerschte Patiente choo. Er hät noch beschtem Wösse und Gwösse gholfe, mit sine uuschädleche Mitteli, so vil und so guet er no hät chöne. Hät er gseh, daß en Mediziner oder en Chirurg ane mueß, so hät ers sine Patiente gseit. Hät er gseh, daß doo kei Doktere und kei Chrütlî meh helft, so hät er au em sebe arme Schlogger gseit, es gäb no no Ein, wo em helfe chönn und wo seb Chrütlî hei, wo us alem Leid und alem Weh ewigs Glück und selige Freud chönn mache. Mengem hät er au gseit, sini Apothek hei er jo dehei i siner Wees, er bruuchi gär kein Dokter. — S isch aber nöd lang gange, isch de guet Chrüterpfarrer wider verrätscht worde vome studierte Dokter. Und s Gricht hät em e Bueß vo föfhondert Franke ufgsalze. Und eerscht no, bi wiiterer Zwiderhandlig mit ere gröößere Stroof vo zehtusig Franke dreut. Daas, hät de de Pfarrer Chüenzli gfonde, sei e chli starche Back, potz tuusig! Was hät er wöle mache? Di Chranke abwiise, wo jede Taag i gröößerer Zahl choo send oder die Stroof risgiere? Oder sis Talent an Nagel hengge? S Volch selb hät de Usweg gfonde. Me hät Onderschrefte gsammlet zunere Initiative und hät im Hui meh als viertusig gkaa. D Zitige hend ghetzt, d Aerzt hend ghetzt, de Groß Root hät degege gstimmt; aber die Initiative hät vor s Volch müese und die Sach hät sich mit



Zizers, im Bündnerland

eme flotte Mehr för di frei Praxis und för de Chrüterpfarrer entschide. A dem Taag hends de bäärtig Pfarrer-Dokter, wo sich ebe damool kein Baart gholt hät, mit eme bekränzte Wage im Triumpf a de Bahn abgholt und heigfüehrt.

Jetzt hät also de Chrüterpfarrer praktiziere tööre. No hends das Patent no e bitzeli verklausuliert: en Schwizer mües eso en Bewerber einewege sii. und i bürgerleche Ehre und Rechte mües er stoh und nöd vorbestrooft sii und zum drette, mües er sich anere Prüefig i Pflanze- und Heilchrüterkenntnis onderzüche.

Di eerschte Bedingige send för üsen Pfarrer Chüenzli sowiso erfüllt gsii. Er ischt goppel en guete Schwizer gsii! Und s Exame? Du mini Güeti, i de Chrüterheilkund hett ers mit jedem ufgnoo. Und do ischt er denn ebe, mit dem Patent im Sack und mit fröhlechem Muet — i glob, es hät sogäär fascht e chli spöttisch i sine Muul- und Augewinkel ine zucket — heigfahre vo siner Prüefig und hät schnuerstracks Huus und Bode gkauft und hät drof sis Chrüterdepot iigrichtet,

Vo doo aa hät ers no vil notlecher öberchoo, nöd blos d Bündnerlüt und d Schwizerlüt us ale Kantoone send zuenem choo, nei, nei, sogäär vo England und Frankriich und us Amerika sends choo und . . . die Zizerser hend Muul und Auge uffspert: de Maharadscha vo Indore ischt mit eme ganze Gfolg i dem Bündnerdorf erschine. (Was em gfehlt hät und öb de Chrüterpfarrer en hei chöne kuriere, seb bini leider nöd ineworde).

Und gschrebe hät de Maa! s «Chrut und Uchrut» hät e mächtigi Uflaag erlebt, en «Chrüteratlas» hät er useggee, de «Pfarrer-Chüenzli-Kalender» ischt all Johr erschine, d «Salvia» ischt als Monatsschreft usechoo und ali send voll gueti Rööt gsii, wie me gsond blibe und gsond werde chöni. Und de Stil, wo de Pfarrer gschrebe hät, ischt elei scho so gsii, daß me sich bim Lese fascht hett gsond chöne lache, so urchig und originell, mengmool fascht e chli groob, aber einewege dütlech, nöd zum Mißverstoh. De Hokuspokus us alte Chrüterbücher hät er ganz wegloo, aber er häts verstande, mit sine große Erfahrig Heilstoffkombinazioone usezfende, wo ganz erstunlichi Erfolg gkaa hend und wo spööter au vo de Pharmazeute öbernoo worde send. Sis gröscht Werch isch s „**Groß Chrüterheilbuech**“ gsii, en Rootgeber för ali Lüt und ali Breschte, Nööt und Liide. Und nooch und nooch hend au ali Apotheker aagfange, sini Mitteli z verchaufe und send froh gsii, om de Erfinder und Produzent im Bündnerland obe.

Soo ischt er achtzgi worde. Und me hät vil Druckerschwärzi verbrucht zum de achtzgjöhrig Prieschtergreis und Chrüterpfarrer z fiire. Dee hät sich aber nöd drom kümmerset. «Schriibed allzue», hät er deenkt und ischt mit siner Nichte uusgwanderet uf Einsidle und Sachsle; er mües go danke goh, hät er gseit, so hei ers glernt vo de Mueter und so well ers halte.

Henderrocks hends denn wider gegen en ghetzt. Damool isch es gege sin Geldseckel gange. Me hät gfonde, de mües e-fang wacker gschwole sii. Und s isch au wörklech e goldigs Oderli gflosse i das Sonneheim z Zizers, wo sich de Pfarrer Chüenzli baut gkaa hät. Er isch debii all de gliich, eifach Maa blebe. Sini Lebeswiis isch denkbaar schlicht gsii. Und en große Teil vo dem, was iigange isch, isch au wider use för aarmi Patiente, wo nöd no vergebe behandlet worde send. sondern grad au no seb überchoo hend, was ene gfehlt hät zum wider uf d Hööchi z choo i jeder Beziehig. Großzügig hät er gholfe, wenn er gholfe hät und er häts esoo gmacht, wies i de Bible stoht. Er häts niene ufgschrebe und keime Mensche gseit, bis es denn halt schließlech de Stüürvogt glich hät müese wösse. Ein einzige Luxus hät er sich gstattet: e Privatkapell. Aber au die isch sine Patiente zguet choo, hät er si doch jede Morge dei ine i sis heilig Opfer iigschlösse und sis Tue und Helfe und eri Nööt und Chümmernis i Gottes Hend gleit.

Und hät me de Pfarrer Chüenzli gfroogt, was er för sich selber för e Rezept aagwendt hei, daß er so aalt hei chöne werde und gsond debii bliibe, so hät er gseit: «I ha mi emool i eerschter Linie nöd om mini Niider und Verlümder kümeret; i ha mi nöd geergeret, wenn i aagreffe worde bii; i has meng-



Der Chrüterpfarrer het's mit em Volch guet chönne

mool lieber mit de Tierli gcaa als mit de Mensche, mit mim Büsi und mim Hond. Mini Freud send d Blueme gsii und min Gaarte, de Holder und d Hagebutte, i ha mini bekannt Frühligskuur au selber gmacht. I bi frueh ufgstande und frueh is Bett gange, i ha eifach gesse, wenig Fleisch und vil Gmües. Und woni elter worde bii, hani au mis Gläsl WII trunke, aber höchstens e Zweierli im Taag. I ha au regelmääßig min Stompe graucht, das isch guet gege Verdauigs-Stöörige, hät er gseit. Und i bi vil spaziere gange, zwei Stond und meh im Taag. Und bis zum 70. Johr bini i d Berg gange und ha mini Freud gcaa a de Flora, a de Murmeli, wo pfiffe hend, a de eifache Sene und a de flinke Gemse. Ales ander ischt Gnaad und Gschenk vom Herrgott gsii», so hät er gseit.

Und soo ischt er 87 Johr aalt worde.

Und wo z Zizers obe seb chlii Glöggli sis End glüütet hät, hät er no wiiter obe a de Pforte glüütet, wo, wie me seit, de heilig Petrus Pförtner isch. Und de hät en sicher ineloo, scho am gliiche Baart zlieb, wo beidi hend. Und wenns de Herrgott guet meint mit em Chrüterpfarrer — und worom sött ers nöd guet meine mit em? — so loot er en sicher zwöschet de Engel und Heilige hii und doo ame Vierbeinige begegne und loot en ineluege i sis ewig groōß Herbarium, wos no Millioone Chrütl meh drenine hät, als de Pfarrer Chüenzli i sine 87 Erdejohre gseh und gstudiert hät. Und mengmol, es get jo so vil uusichtbaari Fäde zwöschet Himmel und Erde, loot er de Chrüterpfarrer teilneh a sim göttleche Helfe und Heile.

Clara Wettach.

(vezellt nam „Große Chrüterheilbuech“)

Wenn de Früehlig donnt!

Muoss de Winter us em Land,
Mag ihn das verdrüsse,
Träne ganzi Chübel voll
Tuot er denn vergüsse.


Tropfe rönned uf de Schnee,
S'git en Pflutsch zom Gruuse.
Schnell uftröchne tuots de Pföö
Mit sim Omepfuuse.

D'Sonn verbrennt di grösste Stöck :
Warm werd's i der Erde.
D'Blüemli stand allmähli uf,
Früehlig will's halt werde.

S'Schneeglöggli hätt zum Willkomm
S'silbrig Glöggli gschwunge.
S'Echo vo dem lieblich Glüt
Ist is Herz mir drunge.

D'Hoffnig ist dervo verwacht,
Chräftig regt si d'Schwinge.
Mengi Sorge sind verschücht
Vo dem heimlech Chlinge.

Chr, K.



Motiv zum Grabmal

(usgeführt vom Professer Fiorenzo Abbondio)

**Der Chrüterpfarrer uf der Alp Sartuns
ob der Lenzerheid**

*

Der Herrgott vo Libige

Wo de jung Pfarrer Künzle z'Libige s'erst Mol i sis Cherchli ine cho ist, ist er grad veschrocke. E sones armseligs hätt er vorher niene gseh. D'Fleder- und d'Cherchemüs hand drin s'Husrecht ka. Wind und Wetter hand s'Regiment gfuehrt. S'Cherchedach ist verlöcheret gsi, wie-n-en alte Regeschirm. S'Murwerch ist volle Riß gsi, de Bode iigsunke und füecht. Es isch e Quell one döre gflosse und hi und do ist si obsi cho. S'ewig Liecht-Lämpli hätt gflatteret, wie ne armi Seel, wenn's Lebe uslöscht. S'nackig Elend hätt de neu Pfarrer aagstarret. — Dä Ablick hätt ne ganz trurig gstimmt. Er ist sälber au schüli arm dra gsi. Sini Bsoldig hätt em chum glanget för Chäs und Erdöpfel und es Schlöckli Holzöpfelmost. Aber woner das buufällig, verlotteret Cherchli sieht, hätt er gseit: «Es gett no en Ärmere, als de Johann Künzle i de Wüesti, **das isch de Herrgott vo Libige!** Aber i will em ufhelfe und a vilem will i abhelfe und das will i!»

Es gett nüd Verlogners, als de Titel «Pfarrherr», för so ne plogeote Seelsorger. Pfarrherr! Bettelpfarrer ist de richtig Name! Es hätt blos eis Mittel för ihn geh, z'bettle und wider z'bettle und nomol z'bettle! — Verstande hätt er das Handwerk us em eff-eff. Er ist druf uf Belgie greist und zo de Flamänder. Vernagleti Herze hätt er ufgsprengt und Schatzchästli und verchnötteriti Geldsäckel. Menge Gyztüfel hätt ihm zwor au öppenemol d'Tör vor de Nase zuogschlage. Drei volli Woche ist er uf de «Walz» gsi. Er hätt do mit em zammegfochtne Geld s'Cherchli schöö renoviert. D'Gmeind hätt kan Rappe müeße dra zahle, im Gegeteil, er hätt d'Cherchestür no abe brocht. Die originellst Komunionbank vom ganze Kanton St. Galle cha mer z'Libige hüt no bestune; de Künstler hätt d'Lideswerkzüg vom Heiland ine gschnitzlet.

S'guot, arm Bergvölchli ist em recht dankbar gsi för sini Hilf. Bekehrige sind nöd nötig gsi, denn es hätt kan enzige Uflat dronder ka. D'Frömmigkeit hätt agfange trüje, wie d'Holderstuude im Früehlig.

Hi und do ist öppe en ehrsams Jümpferli im Pfarrhus erschine und hätt gseit: «I möcht cho go «adie» säge, Herr Pfarrer, i gohne is Chloster!»

Meh als einere hätt denn de Pfarrer Künzle zur Antwort geh: «Nimm den grad es Returbillet!» Sini Prophezeiig hätt jedesmol itroffe. Er hätt sini Lütli kennt. Noch e paar Woche sind die Meitli us Längizit zrock cho, wie de Gugger im Früehlig, bloß hand's denn ka Lost zom Singe ka.

Chr. K. (= Frau Prof. Christine Abbondio-Künzle).

Zwo grüeni Schooße dörf er öberenand aalegge

So hätt de groß Bischof Augustinus Egger vo St. Galle emol ime-ne spezielle Fall mit em Pfarrer Künzle entschide.

Wo nämli de Pfarrer Künzle d'Missionsparrei Buchs gründet ka hätt mit vil Arbet und Schwierigkeite, sind emol zwei höcheri, geistliche Mitbrüeder vo St. Galle zu ihm uf Bsuech cho. I cha mi no selber guot dra erinnere, i bi do grad i de Ferie bi mim Onkel gsi, als chliis Göfli.

Wie hand aber die zwei hochwürdige Herre gstuunet und de Hals greckt zom lange Chrage us, wo si hand müeße gseh, daß de neu Diaspora-Pfarrer mit-re grüene Schooß zmitte i sim Garte dinne stöht und e Benne voll Bschötti füehrt. Sie hand do mit ehrner Meinig nöd chöne zrock halte und hand gseit, eso e Arbet verträg sich denn gwöß nöd mit em geistliche Stand. Min Onkel hätt derzuo no glächlet und hätt agfange s'Gmues göllne.

E paar Tag nochher chont en Brief vom Bischof vo St. Galle, wo's drinn gheiße hätt, de Pfarrer Künzle soll ihm en Erklärig abgeh, worom er als geistliche Herr grüeni Schooße träg etc. De genial und gerecht Bischof Augustinus hätt nie gurteilt, bevor er nöd blos de Kläger, sondern au de Aklagt ghört hätt.

Min Onkel sel. hätt do en gschide, aber echli en ruche Bur a siner statt uf St. Galle als Verteidiger gschickt. Wo dä zom gnädige Herr chont, seit er: «Grüezi wohl, Herr Bischof. I chome wege üsrem Pfarrer. Wössed Sie, noch 400 Johre ist er de erscht katholisch Pfarrer z'Buchs. Wenn er jetz de ganz Tag im lange, schwarze Talar wör ume temple, das gäb e Ufsehe. Üsri protestantische Mitbrüeder hettid das schüli ugern und si chönted globe, si sächtet de Jesuit im Götterli. Will si aber konstatiered, daß üsre neu Pfarrer en Mensch ist, wie sie, aafach und guot mit allne, und sogär selber sin Garte bsorget, so chont's niemet in Sii, Ufride z'stifie. Wößet sie, Herr Bischof, wege de Holzsuehne und de grüene Schooße, won er öppe treit, regt sich kein Chnoche uf, im Gegeteil, mir Buure und au die vile Isebähnler z'Buchs gsehnd das bsonders gern — mir hand so vil meh Zuotraue, er luogt för üs und üseri Gofe wie de bescht Vater!»

«Soo, soo», hätt drof de Oberhirt vo de Diozese St. Galle fröndl gantwortet «Säged si no em Pfarrer Künzle, vo mir us dörfi er i Zuokunft zwei grüeni Schooße öberenand aalegge!»

Chr. K.

Am Radio

(Interview Pfarrer Künzle — A. Welti, 1. 9. 36)

(Red. Will di 5 Platte nümme guet gsi si, isch es nid möglich gsi, ganz es gnaus Stenogramm vo däm Gspräch ufznäh).


1

A. Welti: „Liebi Radiohörer, mir sind im Kanton Graubünden in Zizers, das isch **es** Dörfli nach Landquart. Mir sind imene wunderschöne, wunderschöne Gärtli nebed emene herzige Chalet, und im Garte ine isch ei Pracht vo Blueme, und inere Voliere do singe und pfife d'Vögeli, vilicht könnt Sie's ghöre, mir sind do ufe gfahre, um öppertem zum 80. Geburtstag z'gratuliere, wo Sie sicher, sicher au kenned. Und da steht er vor mir, de Achtzig-Jährige, mit eme wiße Bart und verbrännt vo dr Sunne, no prächtig bineinand, wie me so sait, und hät au en guete Humor. Wüssed Sie, wer das isch? Das isch de Herr Chrüterpfarrer Künzle in Zizers. Also, Herr Pfarrer, mir gratuliere Ihne zu Ihrem Achtzigste.“

Künzle: «Guet, die Gratulation nimmt me a. Sie chont jetz döt her, wie wenns rägnet. Und wenns rägnet, hätts me de Schirm off oder goht ins Hus ine. So mach ichs halt au. Um dene vile Gratulatione z'entgoh, mach mi uf und drus an e Ort, wo's nümme rägnet vo Gratulatione. Denn i ha uf dem Gschmäus nüt. Min Vater selig, wenn mer ihm gratuliert hätts, so wär er mit dr Mistgable dogstande und hets verjagt. Und d'Mueter selig heitt gsait: «Loß mer doch niemert ine». Und so han i nüt druf uf dem. Denn i bi nöd zschold, daß i achtzgi worde bi. I ha kein einzige Tag selber gmacht, kei Hoor selber gmacht, nöd emol en Zeche selber gmacht, was i g'esse und trunke ha, han i au nit selber gmacht. Die Luft, wo-n-i igschnufet ha, han i au nit selber gmacht. Ich mueß als dem danke, wo alls gmach'r hätts. Und dem säged die dumme Lüt Natur und die gschide säged de lieb Gott hätts gmacht. Denn d'Natur isch nur de Erdbode und dä hätts kei Verstand. D'Luft hätts kei Verstand, und s'Liecht hätts au kei Verstand. Und wenn me sait, d'Natur hätts gmacht, so sind das die dümmste, vo de allerdümmste Choga wo's git. Es git nur eine, wo alls cha mache, das isch de Herrgott, und dem säg i Dank und «Ehre sei dem Vater und dem Sohn und dem Heiligen Geist» bättet me vo alters her, katholisch oder reformatiöös. Bi dem blibet mer, so lang e Menschegschlecht git. So, jetzt wüssed-er aber, wora er sind mit der Gratulation».

2

A. Welti: „Jetzt wüssed mer, wora mer sind mit eusere Gratulation und mit euserem Mikrophon. Aber losed Sie, Herr Pfarrer, Sie müend entschuldige, wenn ich Ihne e chli widerspreche. Wenn me halt e so bekannt isch wie Sie, und so vilne Mensche scho gholfe hätts mit de Chrütere und mit em Tee, dänn hätts me halt gwüssi Verpflichtige bim achtzigste Geburtstag und mueß halt i Gottes Name die Gratulatione entgägenäh. Und mueß sogar no en Radio-Reporter näh und mueß sich sogar no dummi Frage stelle loh.“



Der Chrüterpfarrer i sym Rych

Also jetz entschuldige Sie e Mol, jetz wemmer a Mol a bitzeli vorne afange. Wie sind Sie eigentlich uf die Idee mit dene Chrüttere und dene Tee cho?"

Künzle: «Jo, eigentlich vo Hus uf. Min Vater selig isch Gärtner gsi und hätt die Nämme vo de Pflanze gwüstt und hätt hie und do e schöni Blueme heibrocht. Und hätt zum Bispil gsait: «Händ Sorg dezue, das isch en Podentille». Scho als chline Bueb, vor i no i d'Schuel bi, han i scho latinische Nämme uf-

gnoh. Und do nochher, wo-n-i in d'Studieri bi, do han mer en Professer gha, der hätt alli Pflänzli kennt, en Pater in Einsidle und der hätt nöd bloß bätte und singe könne, er hätt au alli Pflanze gwüsst z'finde und de Name z'geh, und mer händ mit dem dörfe spaziere, wer hätt wölle. Und denn häm mir ihm alli Pflänzli gholt vom Feld und gsait: «Wie heißt das, wie heißt das?» Und denn hämers ufgschribe und händ d'Pflanze igleit und händ e Herbarium gmacht. I ha das Herbarium jetz noh, vo anno füfesiebzgi her. Und we me hundert Pflanze kennt, kennt me sofort tusig. Denn jedi Pflanze hätt ihri Verwandte, zum Bispli, wenn me ei Podentille kennt, kennt me drißg. Kennt me ei Hierazium, so kennt me dreihundert, denn me weiß, es git dreihundert Arte. Kennt me e einzige Ehrepris, so kennt me die 28 Sorte Ehrepris, wo vorchond i dr Schwiz. Denn alli gliched en-and wie ei Flüge der andere. Und so chond me druf und denkt, was öppe isch. De Heilwert vo de Pflanze isch mer erst recht klar worde anno 1887, wo de Kneipp es Buech usegeh hätt. Er hätt öppe vierzg Pflanze beschribe und zu was da me chönnt bruche, do han i denkt: Jä so, die cha me au no verwärte. Die sind nöd grad do für s'Veh,

3

d'Lüt chönneds au no bruche. Und bi dozmol Pfarrer gsi und ha die Pflanze brucht für die Chranke. I bi halt dör Seelsorg zur Chrütermedizin cho, denn i ha denkt, me sött au em Lib hälfe, nit grad de Seel. De Heiland hätts üs vorgmacht, er het mit sir Wundercraft Lahmi, Blinde, Ussätzige und Chranki aller Art gheilt, und säb chöne mir nöd, mer chönd kei Wunder tue, aber er hätt in d'Natur ine Mittel gleit, bsunders in d'Chrüter, und sogär im alte Testament heißt's: «Gott hat die Kräuter heilsam gemacht!» Und so bin i druf cho. Wenn do e Mueter do lit, chrank im Bett, het sibe Kind, no chlineri, und der Dokter git sie uf und sait, sie müeß sterbe, da han i denkt, me sött döre Frau doch chönne hälfe. De Maa cha wohl wider e Frau übercho, aber d'Kind kei Mueter meh. Mueter gits nu eini uf der ganze Welt, und wenn die eweg isch, gits kei Mueter meh, e zweiti. Denn han i mini Chrüterkenntnis zämme gnoh, ha Tee gsotte, has dere Frau brocht, do isch sie wider zweg cho. Und do han i wider en Maa troffe, jo wenn de gstorbe wär, wär die gröst Armut det gsi. Do hand alli glebt us sim Verdienst. Dr Dokter sait wider: «I cha nüt me mache, s'isch z'uusserscht duß». Und i nimm wider mini Chrüterkenntnis zemme und helf dem Maa und bringe ne wider uf d'Bei; und so bin i dri cho. Und endlich bin i Pfarrer worde z'Amde obe, das isch gsi anno 1890. Dozmol isch dr erscht Dokter z'Näfels gsi, also drei Stund wit, und no kei Roß z'Amde obe und no kei Post isch ufe. Jetz bis de Dok-

ter de Bricht ka hätti z'Näfels und ufe cho wär, so hätt dr Chrank chönne gstorbe si. Do han i denkt: du als Pfarrer, du bisch verpflichtet, bi dere Fäll z'sorge, wo en Dokter z'spot chämt, wie bi Bluetvergiftig oder bi starche Lungenentzündig und anderi Krankheite oder Kolik, wo me sofort mueß hälfe. Do han i die Pflanze gsammlet und sammle lo dör d'Gofe, und die Fäll sind mer alli vorcho, und ha jedes Mol chönne hälfe. Z'mol i dr Nacht wer i gruefe zumene junge Borsch, en achtzehnjöhrige, er sei am Sterbe, er sei gester gsond und wohl gsi, jetz hei er entsetzlich Buchweh, i soll abe cho, er sei am letzte End. Wo-n-i achum, gsehn i, daß er Kolik hätt. I säg: Hend er im Hus kei Enzian? Moll, das hämmer. Gend em öppe drü Gläsli Enzian i und tünd em es Tuech uf de Buch lege, das er i s'heiß Wasser inegleit hand.

4

Am Morge isch de Borsch zuomer ufe cho, gsond und recht, es hätt em nüt me gfählt. Jo, do bin i halt druf cho uf d'Medizin, wo kein Dokter doo isch oder wo mer kei Mittel weiß, do probiert halt de Pfarrer. Denn d'Nöchsteliebi goht nit bloß uf d'Seel, si goht au uf de Lib, oder denn grad beides mitenand. Und so bin i no vil meh druf cho, wo-n-i z'Herisau e Praxis ka ha, d'Appenzeller strofet kan, wo cha heile. Si strofet nur die, wo Mißbruch tribet; und döt han i chönne mache, was i ha wölle mit de Chrüter. Und han au z'bescht Chrüterbuech entdeckt: dr Taverna montanus. Das isch de glehrtischt Chrüterdokter gsi sit allne Johrhunderte, er hätt alli Dökter kennt, Chrüterdökter vo de Grieche, vo de Römer, vom Mittelalter, vo de Pole, vo de Tscheche, vo de Araber, vo de Engländer, und hätt jedes bruchbar Chrut brocht und hätt die Chrüter nöd no beschribe wie di hütige Botaniker, wo nur säged, das Chrut, die Podentille, ghöret in die Abteilig, es hätt föf Blätter, hätt föf Kelchblätter, hätt vil Chalk i sich und so, und denn wider anderi Abteilige. Die Dommheit hands dozmol nöd gmacht. Hützutag isch d'Dummheit jo in vile Sache obligatorisch. Und wer nöd mitmacht mit Chalbereie, gilt nüt».

A. Welti: „Ja, und so Herr Pfarrer, händ Sie also denn schließlich das Buech gschribe, nit wahr, wo Sie so vilne Lüte ghulfe händ, und wo Sie selber so berühmt worde sind. Das Buech, das goht immer no guet?“

Künzle: «Jo, es hätt jetz denn i de dütsche Uflag über achtmol hundertusig Exemplar. S'isch scho lang i 's Französisch, öbersetzt, i 's Italienisch, i 's Norwegisch, und jetz i Vorbereitig au i 's Romanisch. Und das Chrüterbüechli han i nöd öppe gschribe imene Zimmer mit vier Wände, sondern voruse im Gartehüsli und barärmelig. Do isch es natürli use cho, und will i us em Burestand bi, han i au bürisch gwößt z'rede und bü-

risch gwößt z'schribe, und nöd gschribe, wie die Glehrte schribed. Item, jede Professer hätt mer das dörtue, was i do gschribe ha, wenn is im Gymnasium gschribe hett.

A. Welti: „Und daß Sie nid nu wüssed wie me schribe mueß, sondern daß Sie au no wüssed, wie me rede mueß, das g'sehn mier jetzt hüt do am Mikrophon und händ eusi helli Freud an Ihne, Herr Pfarrer. Jetz no eis: Was macht Sie denn hüt no, tüend Sie no Konsultatione erteile oder wie isch das?“

Künzle: «Also Konsultatione, mündliche gib i keini meh, worum, es chämed all Tag meh als hundert Persone, und drunder mengmol d'Hälfti Schwobe. Extra Billet sind druckt. Konstanz-Zizers, soviel Schwobe sind une ufe cho. Ma cha nöd alli Schwobe heile. Und denn, gabi aber no mündlich Konsultatione, so guet's goht. Alli Brief wo-n-i überchume, tuen-i wenns möglich isch, beantworte; und zwor kurz und guet, wenn d'Lüt nur nöd so langi Brief schribe würdet. Di gschedste Lüt sind d'Engländer und d'Irländer, die schribet ganz kurz vier, füf Zeile, dänn weiß mer alles. Denn chönd d'Schwizer, denn lang niemer, und lang niemer, d'Oestricher schribed lang, aber schöö, d'Schwobe schribet lang und schüli wüescht; und denn wird alles beantwortet; und do han i denn Arbet gnueg. Es chunt drümol im Tag vor, das wird alles dorgange, und i schrib d'Rezept. s'Rezept chond abe is Chrüterdepot, im Chrüterdepot wirds abgschribe, denn wirds verpackt vo de Packer, denn chonds uf Post, und so chond ers denn zletzt über. So goht die Gschicht. Also, Konsultatione mündlich chan i Gotts Name nümme geh, i bi achtzgi, und mit achtzgi sind die meiste scho lang unter em Bode, im Himmel obe oder no emene Ort, wos ne nöd gfällt».

A. Welti: „Und wenn me no uf dr Erde isch wie Sie und no so rüsch-tig, dänn hätt me wirkli s'Rächt, daß me dänn mit achtzgi emol e chli Rueh überchunnt vo de Lüte! Es isch ja immerhin nett vo Ihne, Herr Pfarrer, daß Sie all die vile Brief no durelueged und wahrscheinlich no selber beantwortet, villicht?“

Künzle: «Jo, jo».

A. Welti: „Aber, liebi Hörer, nid wahr, Ihr müend jetz do nit Mißbruch triibe und em Herr Pfarrer jetzt morn alli euri Lide, klage; wenn er em gratuliere wend, so isch es ja öppis anders. So, Herr Pfarrer, i glaube, jetz wäred mer eigeitlich mit eusere Geburtstagsgratulation z'End, isch es schüli gsi?“

Künzle: «Jo, das isch jetz no e chorzi gsi, ich danke alle, wo mer gratuliered, und dene no viil meh, wo mer nöd gratuliered. Ich mueß ne denn nöd antworte.

* * *

Ollen minnen hielan
Gebrauchselbstan fai fangliof
gadmoht fai iwa Gverbiherin.
Mügen wir wiessand vella ofm
Gebrauchselbstan doo enigen Fornichtin
fah im fional fiaam.

Digrob 3/1X43 Job. Künzle

Kto. Ah

Der Dank vom Chrüterpfarrer

Wie hätt de Chrüterpfarrer sin 80. Geburtstag verlebt

S'Wiihrauchfäbli hätt min Onkel bloß am Altoor gschwunge,
em Herrgott z'Ehre. Persönlichi Bewihräucherig hätt er nie
gsuocht und nie wölle, im Gegeteil, er hätt si gfloche, wo er nu
hätt chöne. So au a sim 80. Geburtstag. Er hätt's au nöd gern
a Mitbrüeder gseh, wenn's allpot e Jubiläum gfiret hand, blos
will's a paar Johr älter worde sind. Er ist der Meinig gsi, daß
mer vor em Herrgott viil vo de Verdienste verlürt, wenn de
Rauch vo de Itelkeit drus use schmeckt oder sti...kt.

E paar Tag vor sim 80. Geburtstag sind zwei Herre vom
Radio zo üs uf Zizers cho und hand uf-re Platte es Gspröch mit
mim Onkel ufgnoh. Er hätt grad us em Stegreif gschwäzt. Die
Herre hand gseit, si hebid no selte eso e geistrichi, originelli
Red ghört Das sei scho e Kabinettstück.

Am 3. September 1936 hätt's Schwyzervolch mit Interesse
und Freud am Radio das vernoh.

De Pfarrer Künzle selber ist scho am Vortag vo sim Ehre-

tag «verduftet», er hätt allem wölle entgoht. Er ist zo üsrem Landesvater Bruoder Chlaus noch em Ranft pilgeret. Mit dem Bruoder Chlaus und mit em Herrgott allei hätt er s'Festli gfiret. Kei Wölchli hätt's so trüebt.

Underdesse sind derhei über 500 Glückwunschtelegramm und Brief, wien en Vogelschwarm dether gfloge, vom In- und Osland, sogär vo Bombay her. Vo Amerika ist en Brief cho mit de bloße Ufschrift: «An den Kräuterpfarrer, am Fuß der grauen Hörner». Sös gär kei nöcheri Aagobe, nöd emol vom Land. Die findig Post hätt's aber usebrocht.

E anders Schriibe vom Tessin hätt e langi, langi Irrfahrt gmacht. UF em Couver hätt's gheisse: «Zizers, presso Coira». Im letschte Wörtli ist «o» fast wie-nes «a» gschriibe gsii. UF de Post hand's glese «Cairo». So ist de Brief bi der Hoftpost vo Aegypte glandet. Die Muselmancli hand de Chopf gschöttlet und hand ihn zrockspediert. Mir hand anderst gstuunet ob dene arabische Buochstabe uf em Umschlag.

Nochdem min Onkel hei cho ist, hätt er die vile Gratulatione, die mir onderdesse iibinde loo hand, bloß es bitzli döre gschnüchslet. Er hätt gseit, er woll's denn fertig lese, wenn er i Abraham's Schoß ruebe chön, jetzt heb er kei Zit derzuo und mer weri dervo z'müed.

Chr. K.

Holunder

(*Sambucus nigra*)

Begegnest du am Holderbom,
Lopf ab vor ihm de Huot.
Er stöht als Frönd a üsrem Weg
Und meint's mit allne guot.

Er hätt för di as Elixir,
Es wirkt vom Chopf zo Fuoß.
Wenn d' Jubelgreis studiere witt,
Denn eß vil Holdermuoß !

Bist du vercheltet und verschnopft
Und tuot dir alles weh,
Und zücht din Blosbalg nume
Trink Holderblütetee! [recht,

Bi Wassersucht hätt s'best Rezept
De Holder au för dji.
Zwei Gläsli vo sim Rindesaft
Nimm alltag pünktlech ii!

Und streiket d'Därm, häsch ureins
De Holder helft famos. [Bluot,
Vo frische Worze süd en Trank,
Denn werscht das Liide los!

Au d'Amsle rüehmt de Holder-
Als bsondri Gottesgab. [bom
Sie ströpfled dankbar und ver-
Die schönste Beerli ab. [gnüegt

Chr. K.